

柯竹巖集

心燕題簽

竹巖集卷十六

明詹事府少詹事兼翰林院學士莆田柯潛著

南京戶部主事四世從孫維騏校編

邑庠生員鄉飲賓六世從孫亨

清江南當塗縣知縣九世從孫潮重校梓

邑優行廩生十九世從孫玉樹

福安縣庠生後學丁夢松

七言古詩

讀宋陳忠肅公傳有感

公諱文龍

胡塵捲風天地黑胡騎長驅滿南北
厓山孤主知存亡一夜愁心徧頭白
丈夫恥作負恩生舉手擎天天已傾
孤城如斗

猶百戰蒼蒼不遣功助成龍虎可羈不可擾怒氣吹入山亦
倒君臣大義心自明白日青天懸皎皎嶺海間關草樹寒四
顧無人雙淚彈國破家亡惟一死首陽有薇那忍餐節義文
章埋不爛萬丈虹光燭霄漢我懷往事悲復歌凜凜英風鬢
絲亂

石鐘山

在九江湖口縣

巍乎高哉石鐘之山不知幾千丈但見峰巒如削壁兮突兀
巉巖倚天上陰晴變化忽殊異出沒風雲有奇狀大孤小孤
不可與等齊兮五老香爐屹相向龍盤虎踞誰其使然兮謂
是天作東南一藩障長江浩浩從西來疏派銀潢勢豪壯山
根石罅搏風濤髣髴歌鐘出深浪大音闐闐兮舞幽壑之潛

虬小音嘈呖兮徹遙汀之漁唱馮夷海若紛雜沓兮驚聽廣
樂奏鈞天不似人世尋常鼓盆盎古來騷翁韻士多品題坡
老文章獨官樣懸厓石刻光騰星斗間鬼物撝訶至今尙無
恙名蹤異跡天下所無兮比之方丈蓬壺豈多讓況有濂溪
無極翁栗里陶元亮故居遺址皆在其左右兮流韻餘風可
嘉尙嗟我不得往遊觀兮凝睇遐天常怏怏縉雲大夫亦是
山中人玉雪襟懷出塵軌別家十載客京華魚鳥烟霞誰主
張君當歸去覓舊踪別作丹樓翠閣臨青嶂可以招鰲背之
仙坐詩壇之將我將買棹乘風徑造其間兮日月從君發長
吟酌春釀醉時同上最高峰一覽乾坤氣捲滄溟漲

松隱巖

大山巍巍插天起小山參差如聚米長風吹我上高峰一眺
乾坤三萬里禪房草木深復深危簷滴露生春陰白雲滿地
石臺古老鶴一聲山月沉松牕坐久轉清悄詩思撩人不知
曉我欲此地卜幽棲須待他年濟時了

仙溪龍華寺

寶幢山下烟霞古老樹如龍欲飛舞花氣薰成五色雲泉聲
散作千林雨我愛溪山事事幽錦袍醉踏東風遊題詩淨掃
巖頭石把酒還登竹外樓空門自與人間別夜榻焚香卧清
絕明朝長嘯拂衣歸閒却溪風與山月

對雪作

去年臘月江南村梅花如雪飛紛紛今年飽看京城雪色比

梅花更清絕繁絃急管是誰家流蘇帳煖傾流霞何如金馬
門中客瓦鼎敲冰閒煮茶玉樓稜層銀海動自笑書生能忍
凍漏聲催就碧牕眠一夜寒光照清夢

題司業吳會川瀟湘夜雨圖

君莫說西江山水奇我莫說閩南好邱壑相逢且看畫中山
興入瀟湘雲漠漠雲飛吹雨風濤惡客船盡向汀灣泊苦竹
岡頭泣鷓鴣青草湖邊舞蛟鰐兩岸人家浪打門夜半驚呼
睡難着床床屋漏布衾寒欲走高厓泥沒脚我將誅豐隆鞭
海若坐令雲收雨不作積陰披攘見寥廓拍天巨浪忽消沉
陽光下照羣生樂君當就我破茅廬歌頌唐虞相對酌

天風海濤圖

醉登崑崙峰俯視寰瀛水馮夷怒觸陽侯驚雪浪銀濤拍天
起壯如函關赴敵兵萬騎突出鎗刀聲又如雷公驅律令萬
里轟轟天鼓鳴乾坤都入秋毫小灝氣冥冥失昏曉嗚呼風
停浪靜會有時世事更翻幾時了

山水圖爲兵部郎中王恕題

玉堂清署春風前焚香看畫皆神仙畫中風物得真意峰巒
隱約生雲烟大山如龍欲飛去小山盤盤如虎踞奔流一道
破山來散作濤聲滿江樹遠村微茫三兩家古渡無人橫斷
槎近村茆屋蔭榆柳門前沃土饒桑麻別有高亭向洲渚斜
日滿簾水禽語滄波浩浩欲吞天蜃氣昏昏變成雨初疑匡
廬山下落星灣又似洞庭湖上之君山瓊宮貝闕倚霄漢無

乃蓬壺方丈非人間我生慣識山中樂隨意雲樓與山閣故鄉一別今十年石洞梅花幾開落臨圖忽憶舊遊踪便欲沿溪上邱壑此身許國未應歸回首江天雲漠漠

鍾山射虎圖

壯哉非熊亦非羆胡爲來此鍾山陲舉頭爲城尾爲旂向人一嘯陰風悲金陵年少不敢射萬騎聞聲俱辟易中貴覃公勇無敵眼中見虎如見石獨騎生馬出林梢笑挽强弓發雙鏑一發中其胸再發中其腋須臾虎死負虎歸道傍觀者猶動色昔時射虎裴將軍意氣高薄秋天雲公今繼之號雄武讀書況復能知文安得如公千百輩萬里橫行清塞氛

牧牛圖

千山萬山春雨收遠村近村烟草稠田家牧兒朝放牛穩騎
牛背如乘舟溪南兩牛俱引犢食飽相依卧山麓溪北兩牛
不畏人日暖沙頭戲相觸昔年縣吏督租嚴作程民日苦饑
牛苦耕今年屢下詔書征稅薄民有餘閒牛自樂牧兒亦解
知帝恩拍手唱歌度林壑歌聲徹雲雲漠漠

綬溪秋月爲工部郎中林時讓題

秋天何處多明月延綬溪長水清徹灝氣遙涵牛女墟寒光
直射魚龍穴林君家近城東樓湖山家興常悠悠良宵見月
不能寢放棹便尋溪上遊于今久作金門客纓冕留人歸未
得小閣低簷不滿尋夜夜開牕坐寥闕兔影還來照醉魂只
欠溪聲與山色

玉湖霽雪同前

長湖浩浩寒無潮夜風吹雪聲瀟瀟平明日出耀晴彩萬樹
瓊花猶未消湖南畫館松篁裡錦帳氍毹人未起湖北朱樓
翠幙深獸炭紅鑪酌香蟻竹籬茆屋是誰家瓦鼎敲冰自煮
茶布衣多年冷如鐵蹇驢隨處吟梅花笑渠富貴總塵俗一
味清寒貧亦足

隔竹敲棋爲鄧封君作

綠陰門巷何迢迢日午簷頭蒼雪飄手談偶效橘中叟不是
機心猶未消坐來適意惜日短主人忘形客忘返到頭勝負
置勿論一笑相看遠山晚

菊屏秋色同前

薄寒著人秋欲老粲粲籬花顏色好露香霜艷滿圍屏不肯
凋零隨百草錦袍人是地行仙林下相依晚節堅好懷都付
一樽酒醉和陶詩三百篇

題四景

石屋沉沉春睡足花陰靜轉闌干曲一雙好鳥何處來數聲
啼破千山綠閉門著書今十年兔穎半禿藜牀穿懸黎光夜
竟誰識擁膝長歌梁父篇拂衣欲挂扶桑樹豈合青山久留
住風雷忽起卧潭龍我亦攀鱗上天去

其二

萬頃烟霞護深墅地空無塵倦揮麈屋山流過斷橋西知是
茆簷夜來雨松風滿耳吹泠泠潭花撲硯留殘馨詩成草徧

芭蕉碧餘興捲入遙山青午涼拂拭簞冰卧八翼天門欲飛
過隔林忽有採樵歌響徹牕櫺驚夢破

其三

落紅滿地無人掃碧梧枝頭鳳棲老瓦盆昨夜新酒香一吸
千鍾玉山倒渴思欲吞滄海波細雨小寒生綠莎縱歌拔劍
時起舞氣岸直與秋天摩一朝翻飛向天闕江心空鎖魚龍
穴五雲回首舊遊踪閒却溪風與山月

其四

黃冠使者行令急玉龍戰退玄冥泣敗鱗殘甲墜繽紛青山
變作銀山立寒光滉漾搖坤垠千里萬里空無塵誰家酒樓
恣酣唱翻笑茅簷僵卧人盡宮迥與人閒別寶樹瓊花正堪

折淩風跨鶴試一登高倚瑤臺弄明月

題吏部員外郎鍾景清古松圖

古云不可居無竹我云無松人更俗鍾君標格松之清盡日
臨圖看不足有時邀我話襟期謂我亦與松相宜冰霜老節
長自保樑棟奇材知者誰白日高堂起烟雨回首徂來渺何
許元氣淋漓宇宙寒陰風颯爽蛟龍舞我因物理觀世情變
態紛紛令我驚與君且酌杯中物坐待松梢紅日出

題夏太常竹爲御史鄭孔佐

清卿寫竹真奇絕墨花飛雨寒淋漓砢屨轉石勢萬丈半空
倒挂瓊瑤枝初疑嶰谷春深見暗翠濛濛吹滿面又疑三湘
雪後看勁節蕭森耐歲寒昔年與可探造化絕筆無人識高

價東坡爲記墨君堂從此聲名滿天下文才愧我非東坡強
把霜毫賦短歌歌成不盡圖中趣其奈清卿好手何

畫竹爲袁指揮作

錦袍將軍氣如虎禁直歸來坐深府焚香看畫白晝長怪底
簷頭飛翠雨雨冥冥烟漠漠萬玉寒聲起寥廓心清自覺戶
庭空縱有紅塵無處著乃知將軍真好奇厭看桃李暄春曦
不然如何揮金買縑素只寫砒厓萬丈瓊瑤樹

題鍾景清所藏過廷章畫松時鍾君以吏部郎中擢閩
叅政賦此期之

紛紛畫史何太俗點染春葩媚人目錫山有客襟懷清只寫
蒼松倚巖谷東厓兩株龍虎姿風前吼怒寒颼颼西厓兩株

濃潑黛高拂層雲如翠蓋遠林無數屈鐵枝霜鬢雪虐猶猗猗
猗丈夫見之須勵節不與人間相推移鍾君愛惜此圖如拱
壁粉署尋常展寒碧陰森雨氣發晴牕颯爽秋聲起瑤席君
今持向閩南去均此清陰及黎庶笑歌我亦太平人作詩應
比甘棠樹

題葡萄四景爲陳詹事兄作

風

空庭晝永天風清吹動虬髯縱復橫新涼一夜卷寒碧佳實
纍纍懸水晶山人收取三萬斛釀作香醪秋正熟一斗傾來
詩百篇無心去換涼州牧

雨

漢主離宮秋草碧
貝邱山中暗榛棘
喜見君家紫玉堆
清露凝香濃欲滴
簷頭急雨生曉寒
淒淒亂枯籐
壓畫闌
疑是鮫人泣
珠淚十日西風吹不乾

烟

日高丈五烟漸收
翠色滿庭凝不流
枝頭忽露真珠顆
寒光炯炯懸清秋
草龍珠帳浪誇美
未必甘香有如此
主人珍重不肯嘗
欲走筠籠獻天子

月

風枝裊裊羅簷前
玉乳離離和月懸
高昌佳品不易得
漢使傳來知幾年
夜涼吟倚東樓柱
欲摘微甘薦芳醕
驚見驪龍海上來
拋擲明珠滿秋圓

題山林圖送林伯安還鄉

前山盤盤橫黛綠後山峩峩擁蒼玉一泓流水抱幽村百丈懸厓挂飛瀑竹籬茅屋白雲閒縈紆石徑苔花斑斜川杜曲無乃是亦似莆城烏石山君家正住山之下遂館崇軒總瀟灑喬林六月生清秋門外尋常有車馬旅食京華五六年夢魂常在水雲邊如今喜買扁舟去舊遊踪跡還依然素餐我亦久爲客塵土迷人空太息送君不及隨君歸一片遙岑望中碧

張祖年交翠軒

金陵佳麗冠天下碧水丹山總堪畫張君觀之心未厭植草移花滿臺榭白雲司理晚歸來入門便覺無塵埃草舍古色